

«Per nus in svilup positiv»

Las pendicularas austriacas augmentan ils prezis

DAD ANDREAS CADONAU / ANR

■ **Ei dat era bunas novitads per las pendicularas grischunas. Fertan che la concorrenza denter las interpresas indigenas sforza dad adattar ils prezis en favur dalla clientela va la gronda concorrenza da tschella vart dil cunfin en direenziun cuntraria. Las interpresas austriacas adatteschan lur prezis ensivars, en media per quater pertschien.** Paregliar prezis e puschidas dallas pendicularas daventa pli e pli hanau en consequenza da rabats e prezis flexibilisai tenor temps ed aura. La plattafuorma digitala Snowplaza cun sedia en Hollanda che porscha informaziuns davart il sport d'unviern fa tuttina l'emprova. La plattafuorma ha actualmeins paregliu il prezis dalla carta da sis gis dallas grondas interpresas da pendiculara ellas Alps.

E la resumaziun da quella retschera ei sorprendenta. Fertan ch'igl ir cun skis en Svizra daventa pli favoreivel creschan ils prezis dalla concorrenza directa da tschella vart dil cunfin. En media augmentan las interpresas austriacas, tudestgas e talianas ils prezis dalla carta da sis gis per quater pertschien. Tenor las indicaziuns dalla plattafuorma augmenta Sölden per exempel il prezis dalla carta da sis gis per 5,9 pertschien sin 285 euros, agl Arlberg cuosta la medema carta 275 euros, quei ei tschun pertschien dapli ch'igl onn precedent. En general ei igl augment da prezis leu il pli aults nua che la carta ei pli favoreivla.

A medema caschun menziuna la plattafuorma la situaziun dallas pendicularas svizras che desistan dad augmentar ils prezis e numnadas vegnan diversas destinaziuns svizras e grischunas che hagian adattau il prezis dalla carta da sis gis en la direenziun cuntraria alla concorrenza digl exterior.



Ils svilup dalla bursa ed igl augment dils prezis dallas interpresas austriacas plaidan silmeins empau en favur dallas pendicularas grischunas.

FOTO GRISCHUN VACANZAS

Sulet effect dalla bursa

Il paregl direct dils prezis indicai en euros muossa denton ch'igl ir cun skis en Svizra ei tuttina pli car. La carta da sis gis a Zermatt cuosta tenor Snowplaza 330 euros cun in minus 4,9 pertschien visavi igl onn vargau, a Sogn Murezi cuosta la medema carta 326 euros cun in

minus da tschun pertschien, per Tavauclostra vegn indicau 297 euros cun in minus da 5,1 pertschien e la finfinala Arosa-Lai cun in minus da treis pertschien ed in prezis da 295 euros. La carta da sis gis ei, per prender igl exempel dallas pendicularas da Zermatt, la pli impurtanta carta d'entrada el territori

da skis al pei dil Matterhorn ed ella vegn vendida il pli stedi. Il tgamun dallas pendicularas da Zermatt, Markus Hassler, ha getg d'haver midau insomma nuot vid il prezis dalla carta da sis gis. Las indicaziuns fatgas sin la pagina da Snowplaza sebasien sin paregliaziuns da prezis en euros ed aschia segien ils pli

bass prezis dallas interpresas svizras sulet d'attribuir agl effect dalla bursa en media da tschun pertschien.

Tenor il gi dil paregl da prezis pudesi igl effect aunc esser pli grond, entochen siat pertschien. In effect positiv per las interpresas svizras essend ch'il franc svizzer ha piars empau da sia valur viers igl euro.

Stabilitad politica ei impurtanta

Ella medema crena dat il directur dallas pendicularas da Samnaun, Mario Jenal. El tschontscha dad in effect positiv gest per sia interpresa che sto en vesta alla collaboraziun cun la pendiculara dad Ischgl calcular en euros. Il meinagestion dallas pendicularas da Samnaun ei pertscharts dalla dependenza dil svilup economic dalla stabilitad politica el spazi digl euro per generar in effect positiv sin la bursa.

Impurtanta ei tenor sia experienza era la stabilitad dil dollar. Viers la politica americana actuala ha Jenal articulau certs dubis che quella politica fructificheschi la stabilitad. Pertuccont l'adattaziun dils prezis dalla branscha dallas pendicularas austriacas ha il directur dallas pendicularas da Samnaun tschintschau dad in cumplet auter svilup ell'Austria visavi la Svizra. El ha menziunau l'inflaziun cuntinuada e las pagas carschentadas dils onns vargai che sforzien las interpresas austriacas dad adattar lur prezis.

Hassler da sia vart ha numnau las grondas investiziuns fatgas dallas pendicularas austriacas cun sustegn statal. Per mantener quels novs stabiliments detti ei denton negin sustegn e quel stoppi vegnir finanziaus ord atgna forza. Jenal tschontscha dad in svilup positiv e da sia speronza che quel seigi durabels. «En gliez cass essan nus en quater ni tschun onns puspei habels da concuorer.»

«Plötzlich Papa» el kino a Sagogn

■ **(anr)** Sonda, ils 28 d'october 2017 muossa Pro Sagogn ella halla plurivalenta il film «Plötzlich Papa». Gia dapi 19 onns organischa l'unien occurrenz da divertiment e seras da kino cun program accumpignont da different gener. Quella sera ei in dils puncts culminants digl onn per l'unien e ses commembers. Avon la sera da film d'uonn dat ei puspei ina puschida speciala. Il Chor d'affons Surselva sut la direenziun da Rilana Cadruvi vegn ad instradar la sera, el vegn a prender cun el igl auditori e menar el dil concert tiel film. Il film «Plötzlich Papa» muossa ina historia particulara: Cheu vegn ina giuvna mumma tier in um culs plaid: «Cheu, quei ei tia feglia – uss eis ti vidlunder, s'occupa dad ella!» Samuel (Omar Sy) viva ella Frontscha dil sid e gauda cumpleinamein sia veta da single. Mintga gi sulegl, riva e sedivertir. In bi gi stat Kristin (Clémence Poésy), ina

carezada d'antruras, avon esch-casa. En bratsch ha quella ina sorpresa: Gloria, sia feglia, ed el saveva gnanc che quella existi. Aunc avon che Samuel realisescha la situaziun ei Kristin era gia svanida. Anavos tier el resta denton Gloria. El duess s'occupar persuls da quei affon? En panica sgola Samuel suenter a Kristin ch'ei ida a Londra. El enquera adumbatten ella. Sper il cant dils affons ed il film divertent e turbulent s'auda era la cumpignia da giuven e vegl tier quella sera da kino. Per quei vegn il film mussaus senza limita da vegliadetgna. E quella sera van ins senza tschenar ord casa. Pertgei la sera da kino porscha era quei: Alla sera da kino a Sagogn dat ei salata da truffels, hotdogs, ligiongias engiadinesas ed ina elecziun da pettas e tuortas che vegnan a far queidas. L'entrada alla sera da kino ei libra, ei dat ina collecta. Il film «Plötzlich Papa» vegn mussaus ella versiun tudestga.

Di da romontsch dalla Conferenza Generala Surselva

■ **(cp)** Igl ei daventau tradiziun che la Conferenza Generala Surselva (CGS) organischa mintg'onn igl atun in di da romontsch. La dieta d'uonn ha liug ils 8 da november a Glion en claustra dallas soras dominicanas. Igl avonmiezdi ei organisau ina prelecziun litterara e silsuenter tschun moduls da different gener che san vegnir eligi tenor interess e scalem da scola. Il suentermiezdi dat ei ina presentaziun d'in cudisch da canzuns romontschas en cumbinaziun cun ina presentaziun musicala. Silsuenter sespleiga la radunonza generala.

Las finamiras centralas dalla dieta ein da possibilitar inscuters en in ravugl romontsch ed il dar impuls e support alla scola romontscha. Quei sereflectescha era ella puschida dil Di da romontsch hodiern nua ch'ei vegn spitzgau rodund 150 scolastas e scolasts. Las activitads principalas actualas dalla CGS ein igl engaschi per: la produenziun da mieds d'instrucziun romontschs; la produenziun e la tgira da material didactic romontsch; la tgira dil Center linguistic online (Celion), ina plattafuorma erigida e tgirada dallas treis conferenzas generalas romontschas CRGC, CGL, CGS che porscha in sustegn linguistic per mintga persuna d'instrucziun romontscha (cf. www.celion.ch), contacts e collaboraziun cun uniuns da semegliant scop e l'organisaziun e realisaziun dil Di da romontsch annual.

Las annunzias pil Di da romontsch san vegnir realisadas da mintga singula persuna d'instrucziun via la pagina cgsurselva.ch.

Saltar da cuminonza

■ **(anr/ac)** La fotografa Esther Vonplon ed igl autor Jürg Halter presentan la proxima gievgia, ils 19 d'october lur ovra comunabla «Alleine tanzend-irgendwo» sin la tribuna dil Cinema Sil Plaz. La fotografa ed igl artist sebrattan dapi entgens onns intensiv davart lur enconuschentschas artisticas. Il resultat da quei brat ei ina ediziun comunabla – tenor las indicaziuns dalla casa editura – che metta en damonda la noziun patria per sligiar ella a moda complexa. Omisus artists ein viagai en divers loghens

per tschercar en tun e maletg l'absenza humana. La fotografia e las poesias entran en in dialog davart identitad e derivonza. Ils viadis individuals meinan la fotografa ed igl autor comunabla in la gievgia proxima sin la tribuna dil Cinema Sil Plaz. La vernissascha dad «Alleine tanzend-irgendwo» da gievgia, ils 19 d'october allas 20.15 cuntegn ina prelecziun ed in film cuort ed il Cinema Sil Plaz empermetta ina sera speciala.

Reservaziuns via cinemasilplaz.ch



Esther Vonplon e Jürg Halter presentan el Cinema Sil Plaz lur ovra comunabla.

FOTO E. VONPLON



Il placat «Plötzlich Papa».

MAD